



Կարգապահական գործ թիվ ԿԳ-25037

Հայաստանի Հանրապետության փաստաբանների պալատի
կարգապահական հանձնաժողովի

Ո Ր Ո Շ ՈՒ Մ

**ՓԱՍՏԱԲԱՆ ԱՐՄԵՆ ԱՐԱՐԱՏԻ ՀԱՐՈՒԹՅՈՒՆՅԱՆԻՆ ԿԱՐԳԱՊԱՀԱԿԱՆ
ՊԱՏԱՍԽԱՆԱՏՎՈՒԹՅԱՆ ԵՆԹԱՐԿԵԼՈՒ ՀԱՐՑԸ ՔՆՆԱՐԿԵԼՈՒ ՄԱՍԻՆ
(ՎԵՐԱՊԱՏՐԱՍՏՄԱՆ ԳՈՐԾՈՎ)**

Հայաստանի Հանրապետության փաստաբանների պալատի (**այսուհետև նաև՝ Պալատ**) հանձնաժողովը (**այսուհետև նաև՝ Հանձնաժողով**), Հանձնաժողովի նախագահ՝ Տաթևիկ Շալոյանի, Հանձնաժողովի անդամներ՝ Վահե Աստվածատրյանի, Կարինե Բաղդասարյանի, Կարեն Խալաթյանի և Արաքս Վարդանյանի կազմով,

Գրավոր ընթացակարգով քննության առնելով փաստաբան **Արմեն Արարատի Հարությունյանին** (**արտոնագիր թիվ 1106**) (**այսուհետև՝ Փաստաբան կամ Պատասխանող**) կարգապահական պատասխանատվության ենթարկելու վերաբերյալ հարցը,

Պ Ա Ր Զ Ե Ց՝

1. Կարգապահական վարույթ հարուցելու առիթը և հիմքը.

Հայաստանի Հանրապետության փաստաբանական ակադեմիայի (**այսուհետև՝ Ակադեմիա**) ղեկավարի 04.12.2024թ. տեղեկանքի (մուտք՝ 09.12.2024թ.) համաձայն՝ փաստաբան **Արմեն Արարատի Հարությունյանը 2024թ. առաջին կիսամյակի (հունվար-հունիս)** ամիսներին չի մասնակցել պարտադիր վերապատրաստման որևէ դասընթացի:

2. Կարգապահական վարույթ հարուցելու մասին որոշումը.

Պալատի նախագահի ժամանակավոր պաշտոնակատարի 09.01.2025թ. թիվ 40-Ա/ԿԳ-25037 որոշմամբ կարգապահական վարույթ է հարուցվել Փաստաբանի նկատմամբ՝ «Փաստաբանության մասին» օրենքի (**այսուհետև նաև՝ Օրենք**) 19-րդ հոդվածի 1-ին մասի 4.1 կետի, 45.12-րդ հոդվածի 2-րդ մասի և Պալատի ընդհանուր ժողովի 2019 թվականի հոկտեմբերի 19-ի թիվ 1-Լ որոշմամբ հաստատված փաստաբանի վարքագծի կանոնագրքի (**այսուհետև նաև՝ Կանոնագիրք**) 2.8.2 ենթակետի խախտման հատկանիշներով:

16.01.2025թ. կարգապահական գործի նախապատրաստումը հանձնարարվել է Պալատի աշխատակազմի սպասարկող անձնակազմի աշխատակից Գարիկ Հախնազարյանին (**այսուհետև նաև՝ Աշխատակից**):

Թիվ ԿԳ-25037-2-Ա
12.05.2025թ.



3. Փաստաբանի համառոտ բացատրությունները.

Սույն կարգապահական վարույթի օրինականությունն ապահովելու և արդարացի լուծման համար նշանակություն ունեցող հանգամանքները բացահայտելու նպատակով՝ 14.02.2025 թվականին Դիմողին առաջարկվել է՝ Օրենքի 39.5 հոդվածի 4-րդ մասին համապատասխան, գրությունը ստանալու պահից մեկշաբաթյա ժամկետում ներկայացնել կարգապահական վարույթի համար անհրաժեշտ ապացույցներ:

Պալատում մուտքագրվել է Փաստաբանի 25.02.2025թ. էլեկտրոնային փոստով ուղարկված նամակը, որով վերջինս հայտնել է, որ դասավանդում է Եվրասիա միջազգային համալսարանի իրավագիտության ամբիոնում իրավունքի բնագավառում և կից ներկայացրել է նույն համալսարանի կողմից տրված տեղեկանքը:

4. Պալատի աշխատակազմի սպասարկող անձնակազմի աշխատակցի եզրակացությունը և գործի հանձնումը Հանձնաժողովին.

Գործի նախապատրաստման արդյունքում Աշխատակիցը 14.03.2025թ. կազմել է եզրակացություն:

Սույն կարգապահական գործը 14.03.2025թ. հանձնվել է Հանձնաժողովին:

Հանձնաժողովը 18.03.2025թ. կարգապահական գործն ընդունել է վարույթ, նշանակել է զեկուցող, ինչպես նաև կարգապահական պատասխանատվության ենթարկելու հարցի մասին որոշման հրապարակման օր, այն է՝ 12.05.2025թ.:

5. Գործի հանգամանքները՝ առկա ապացույցների վկայակոչմամբ.

Հանձնաժողովը, ուսումնասիրելով գործում առկա գրավոր փաստաթղթերը, հաստատված է համարում հետևյալ փաստերը.

1) Փաստաբանը 2024թ. առաջին կիսամյակի (հունվար-հունիս) ամիսներին չի մասնակցել պարտադիր վերապատրաստման որևէ դասընթացի: Սույն փաստը հաստատվում է ՀՀ փաստաբանական ակադեմիայի ղեկավարի 04.12.2024թ. տեղեկանքով:

2) Փաստաբանը դասավանդում է Եվրասիա միջազգային համալսարանի իրավագիտության ամբիոնում, իրավունքի բնագավառում: Սույն փաստը հաստատվում է Փաստաբանի 04.02.2025թ. էլեկտրոնային փոստով ուղարկված նամակին կից ներկայացված տեղեկանքով:

3) Եվրասիա միջազգային համալսարանը հանդիսանում է լիցենզիա ստացած և հավատարմագրված ոչ պետական բարձրագույն մասնագիտական ուսումնական հաստատություն: Սույն փաստը հաստատվում է ՀՀ ԿԳՄՄՆ կայքում առկա ցանկով (Տե՛ս <https://escs.am/am/news/6661> հղումը):

4) Պալատի խորհրդի 13.01.2023թ. թիվ 2/5-Լ որոշման ուժի մեջ մտնելուց հետո Փաստաբանի նկատմամբ նվազագույն ժամաքանակով վերապատրաստման դասընթաց չանցնելու հիմքով վարույթը հարուցվել է առաջին անգամ: Սույն փաստը հաստատվում է Պալատի աշխատակազմի ղեկավարի 25.03.2025թ. տեղեկանքով:

6. Հանձնաժողովի պատճառաբանված եզրակացությունը և որոշումը.

Հիմք ընդունելով Հանձնաժողովի կողմից հաստատված փաստերը, կարգապահական գործը նախապատրաստող Աշխատակցի եզրակացությունը և քննարկվող իրավահարաբերությունները կարգավորող կանոնները՝ Հանձնաժողովը գտնում է, որ Փաստաբանի հարուցված կարգապահական վարույթը ենթակա է կարճման՝ հետևյալ պարճառաբանությամբ.



Օրենքի 7-րդ հոդվածի 2-րդ մասի 3-րդ կետի համաձայն՝ փաստաբանների պալատի խնդիրներն են, ի թիվս այլնի, կազմակերպել փաստաբանի ունկնդիրների մասնագիտական ուսուցումը և փաստաբանների վերապատրաստում:

Օրենքի 10-րդ հոդվածի 4-րդ մասի 6-րդ կետի համաձայն՝ փաստաբանների պալատի խորհուրդը՝ սահմանում է փաստաբանի անդամավճարի և հավակնորդի մուտքի ու այլ վճարների, փաստաբանների վերապատրաստման համար անհրաժեշտ վճարների չափերը, ինչպես նաև դրանք վճարելու կարգերը:

Օրենքի 19-րդ հոդվածի 1-ին մասի 4.1 կետի համաձայն՝ փաստաբանը պարտավոր է սահմանված կարգով և ժամաքանակով մասնակցել սույն օրենքով նախատեսված վերապատրաստման դասընթացներին, բացառությամբ սույն օրենքով կամ փաստաբանների պալատի կանոնադրությամբ նախատեսված դեպքերի:

Օրենքի 45.12 հոդվածի 2-րդ մասի համաձայն՝ փաստաբանը պարտավոր է անցնել փաստաբանների պալատի խորհրդի սահմանած կարգով և ժամաքանակով վերապատրաստման դասընթացներ, որոնք չեն կարող երկու տարվա ընթացքում քառասունութ ժամից պակաս լինել:

Կանոնագրքի 2.8.2 ենթակետի համաձայն՝ փաստաբանը պարտավոր է Պալատի խորհրդի կողմից սահմանված կարգով և ժամաքանակով մասնակցել Օրենքով նախատեսված վերապատրաստման դասընթացներին:

Պալատի խորհրդի 13.01.2023թ. թիվ 2/5-Լ որոշմամբ հաստատված «Փաստաբանների վերապատրաստման, դրա համար անհրաժեշտ վճարների չափը սահմանելու և վճարելու կարգի» (այսուհետև՝ Կարգ) 9-րդ կետի համաձայն՝ յուրաքանչյուր կիսամյակի (վեց ամսվա) համար փաստաբանը պետք է անցնի **նվազագույնը 12 (տասներկու) ակադեմիական ժամ (այսուհետև՝ ժամ, 1 (մեկ) ակադեմիական ժամը հավասար է 40 (քառասուն) րոպեի) ժամաքանակով (այսուհետև՝ Նվազագույն ժամաքանակով) վերապատրաստման դասընթացներ:**

Կարգի 8-րդ կետի համաձայն՝ վերապատրաստման դասընթացները կազմակերպվում են ըստ կիսամյակների, բացառությամբ Կարգով նախատեսված դեպքերի: Կիսամյակի հաշվարկը՝ ա) սկսվում է հունվար ամսից և ավարտվում հունիսին (ներառյալ), կամ բ) սկսվում է հուլիս ամսից և ավարտվում դեկտեմբերին (ներառյալ):

Կարգի 22-րդ կետի «է» ենթակետի համաձայն՝ փաստաբանը վերապատրաստմանը մասնակցելու պարտավորությունից ազատվում է սույն կարգին համապատասխան՝ հետևյալ դեպքերում.

(...)

«է» պետական կամ հավատարմագրված ոչ պետական բարձրագույն ուսումնական հաստատությունում, ինչպես նաև ՀՀ արդարադատության ակադեմիայում դասավանդող փաստաբանները՝ իրավունքի բնագավառում դասախոսություն անցկացնելու դեպքում.

Փաստաբանի մասնագիտական բարձր որակավորումը և իր պարտականությունների բարեխիղճ կատարումը փաստաբանության ինստիտուտի հանրային ընկալման առանցքային տարրերից են, որոնց բացակայությունն արժեզրկում է փաստաբանի՝ որպես իրավապաշտպան և արդարադատության կայացմանը նպաստող գործառույթներ իրականացնող անձի հասարակական նշանակությունը:

Փաստաբանի վարքի նկատմամբ հարաբերականորեն խիստ սահմանափակումները պայմանավորված են փաստաբանի մասնագիտության առանձնահատուկ բնույթով և հանրային բարձր կարգավիճակով, որը պայմանավորված է փաստաբանության՝ որպես իրավապաշտպան գործունեության մեծ կարևորությամբ:

Ընդ որում, չնայած նրան, որ սահմանված Կարգով և ժամաքանակով

վերապատրաստման դասընթացներին չմասնակցելն ինքնին հանդիսանում է կարգապահական խախտում և փաստաբանի համար առաջացնում է բացասական հետևանք կարգապահական տույժի տեսքով, այնուամենայնիվ, Կարգը նախատեսել է որոշակի պայմաններ, որոնց դեպքում փաստաբանը ազատվում է վերապատրաստումներին մասնակցելու պարտականությունից, իսկ նշված պայմանների առկայությունը հայտնաբերվելու դեպքում Հանձնաժողովը կարճում է հարուցված կարգապահական վարույթը: Այդ պայմաններից են.

- փաստաբանը դասավանդում է պետական կամ **հավատարմագրված ոչ պետական բարձրագույն ուսումնական հաստատությունում** և

- փաստաբանը դասավանդում է իրավունքի բնագավառում:

Տվյալ դեպքում, Հանձնաժողովն անհրաժեշտ է համարում արձանագրել, որ փաստաբանը 04.02.2025թ. էլեկտրոնային փոստով ուղարկել է գրություն և հայտնել, որ 2023 թվականից դասավանդում է Եվրասիա միջազգային համալսարանում: Ներկայացրել է նաև նույն համալսարանի ռեկտոր՝ Ա. Օհանյանի կողմից տրված տեղեկանքը, որում նշված է, որ Փաստաբանը 2023-2024թթ. դասավանդել է նշված համալսարանի իրավագիտության ամբիոնում, հետևյալ առարկաները՝

1. Փաստաբանական ծառայություն և դատական ներկայացուցչություն – 4 ժամ,
2. Քաղաքացիական իրավունքի և դատավարության հիմունքները – 40 ժամ,
3. Քաղաքացիական գործերի քննության տարբերակված ձևերը ՀՀ-ում – 54 ժամ,
4. Աշխատանքային վեճեր – 54 ժամ:

ՀՀ ԿԳՍՄՆ կայքում առկա տեղեկատվության համաձայն «Եվրասիա միջազգային համալսարան»-ը հանդիսանում է հավատարմագրված ոչ պետական բարձրագույն ուսումնական հաստատություն:

Այսինքն ստացվում է, որ Փաստաբանը 2023-2024թթ. դասավանդել է հավատարմագրված ոչ պետական բարձրագույն ուսումնական հաստատությունում և իրավունքի բնագավառում:

Վերը նշված փաստերից ակնհայտ է, որ Փաստաբանը Կարգի 22-րդ կետի «է» ենթակետի ուժով ազատված է եղել վերապատրաստում անցնելու պարտականությունից:

Հետևապես, Հանձնաժողովը գալիս է եզրահանգման, որ առկա են Կարգի 22-րդ կետով սահմանված պայմանների կիրառման հնարավորությունը, ինչի հաշվառմամբ Փաստաբանի նկատմամբ հարուցված սույն կարգապահական վարույթը ենթակա է կարճման:

Վերոգրյալից ելնելով և ղեկավարվելով Օրենքի 11.1-րդ հոդվածի 3-րդ մասով, 39.7-րդ հոդվածի 5-րդ մասի 2-րդ կետով և 7-րդ մասով, 39.9-րդ հոդվածի 1-ին մասի 1-ին կետով, Հանձնաժողովը՝

Ո Ր Ո Շ Ե Ց՝

1. Փաստաբան Արմեն Արարատի Հարությունյանի (արտոնագիր թիվ 1106) նկատմամբ Օրենքի 19-րդ հոդվածի 1-ին մասի 4.1 կետի, 45.12-րդ հոդվածի 2-րդ մասի և Փաստաբանի վարքագծի կանոնագրի 2.8.2 ենթակետի պահանջների խախտման հադկանիշներով հարուցված թիվ ԿԳ-25037 կարգապահական վարույթը կարճել:

2. Հանձնարարել Հանձնաժողովի նիստերի քարտուղարին՝ սույն որոշման մասին իրազեկել Փաստաբանին:

Ծանոթություն. Սույն որոշումը կարող է բողոքարկվել ՀՀ փաստաբանների



պալատի խորհուրդ կամ դատական կարգով այն ստանալու օրվանից մեկամսյա ժամկետում: Սույն որոշումն ուժի մեջ է մտնում այն Փաստաբանի կողմից ստանալու հաջորդ օրվանից:

**ՀՀ փաստաբանների պալատի
կարգապահական հանձնաժողովի
նախագահ՝**

**Թիվ ԿԳ-25037-2-Ա
12 մայիսի 2025թ.
ք.Երևան**



Տաթևիկ Շալոյան